

PANDUAN MENGENAL PASTI AJARAN SERTA FAHAMAN SESAT PENGAMALNYA MENURUT PERSPEKTIF ISLAM DAN BAGAIMANA IA MEROSAKKAN AQIDAH, FIZIKAL, MENTAL DAN KEHIDUPAN UMAT ISLAM

FASA 1

MAKSUD AJARAN SESAT

Ilmu dan amalan yang menyesatkan **Aqidah, Syariat dan Akhlak** seseorang Islam melalui **lidah, anggota dan hatinya di semua tempat, waktu dan masa.**

Asas Seseorang Menjadi Kufur Atau Murtad Dan Bidaah Dholalah ialah :

(1) Jahil Murakab

(2) Jahil Basit

(3) Rabtul A'di

- Iaitu bepegang teguh pada hukum adat dalam hidup dan kehidupan dengan menolak Hukum Syarak(Taklif) dan Hukum Akal.
- Hukum Syarak(Taklif) itu ada 5, iaitu :
 - i. Wajib
 - ii. Haram
 - iii. Sunat
 - iv. Makruh
 - v. Harus
- Tiap-tiap Hukum Syarak(Taklif) itu ditentukan oleh 5 Hukum Wadhoi untuk membolehkan seseorang itu berada padanya, iaitu :
 - i. Syarat
 - ii. Sebab
 - iii. Mani'
 - iv. Sah
 - v. Batal
- Hukum Akal itu ada 3 :
 - i. Wajib
 - ii. Mustahil
 - iii. Harus

(4) Taqlidul Rad'di

Ikut membabi buta tanpa merujuk kepada Hukum Syarak dan Hukum Akal serta kepada ulama'-ulama' yang ahli pada babnya, faham dan beramal dengan ilmunya.

(5) Tahsinul Aqli

Mengikut kebijaksanaan pemikiran, menolak hujah Al-Quran, Hadis, Ijmak Ulama dan Qias dalam Aqidah, Syariat dan Akhlak.

(6) Hululliah

Mengi'tikad zat Allah SWT itu menjelma di dalam alam, menyerupai sesuatu daripada alam zahir dan batinnya, umpamanya l'tikad Yahudi iaitu zat Allah SWT menjelma dalam alam menyerupai nabi Allah Uzair AS dan l'tikad Kristian yang zat Allah SWT menjelma dalam alam menyerupai Mariam dan Nabi Isa AS.

(7) Tanasikhul Arwah

Mengi'tiqad zat nabi-nabi, wali-wali atau malaikat menjelma masuk ke dalam diri seseorang dan orang yang mendapat penjelmaan itu boleh menzahirkan beberapa kelebihan yang menyalahi kebiasaan bagi membuktikan kebenarannya.

Peringatan :

Tidak ada nas Al-Quran, Hadis, hujah Ulama' atau Qias, yang menyatakan roh nabi-nabi, wali-wali atau malaikat diizinkan Allah SWT menjelma masuk ke dalam diri seseorang. Hanya yang ada ialah roh jin yang mempernamakan dirinya sebagai roh nabi, wali atau malaikat kerana menipu daya manusia untuk terjun dalam sesat Aqidah, Syariat dan Akhlak dalam Islam.

(8) l'tiqad Wahdatul Wujud

Mengi'tikad zat Allah SWT menjelma pada mana-mana tempat dalam diri dan bersatu dengan roh, sehingga pada masa itu orang itu mengaku Tuhan. Meninggalkan segala amalan syariat, menghalalkan yang haram dan terangkat segala taklif syarak pada dirinya, umpamanya nikah batin, sembahyang, puasa, haji dengan niat dan lain-lain.

(9) Menghuraikan Al-Quran, Hadis dan Kitab-kitab ulama' dengan jahil kaedah Bahasa Arab atau tidak memasuki mana-mana majlis pengajian atau tidak mengambil daripada mereka yang mahir Bahasa Arab lagi alim serta beramal dengan ilmunya.

(10) Mereka yang berilmu pengetahuan tinggi tetapi kurang cermat mentafsir Ayat Al-Quran, Hadis atau kitab-kitab ulama' kerana ada pada naluri mereka kepentingan diri dan duniawi.

FASA 2

Tanda-tanda suatu amalan dan orang yang beramal itu berada dalam sesat Aqidah, Syariat dan Akhlak :

- (1) Ada perjanjian yang disertakan dengan sumpah bagi memaksa diri seseorang itu beramal dengan segala yang baik (Wajib, Sunat & Harus) dan meninggalkan segala yang jahat (Haram & Makruh).
- (2) Patuh Pada Perjanjian :
 - (a) Patuh kepada janji yang sama dengan Hukum Syarak, samada yang Wajib, Sunat, Haram, Makruh atau Harus bagi mendapatkan sesuatu yang menyalahi kebiasaan.
 - (b) Patuh kepada perjanjian yang Harus dalam Syarak bagi mendapatkan sesuatu yang menyalahi kebiasaan yang dinamakan pantang larang.
 - (c) Patuh dalam perjanjian yang Haram dalam Hukum Syarak.
- (3) Jenis-jenis latihan yang ada sifat marah atau dimarahi bagi menzahirkan perkara-perkara yang menyalahi kebiasaan.
- (4) Mengi'tikad segala wirid, jampi dan doa boleh menghasilkan sesuatu yang dihajati (berada dalam Syak, Zon dan Waham di dalam Aqidah) kepada Allah SWT.
- (5) Amalan yang tidak diketahui asal-usulnya. Paling kurang amalannya hendaklah sampai kepada ulama'-ulama' muktabar yang ahli pada babnya dan dipercayai akan kebenaran ilmu dan amalnya.

FASA 3

Perkara-perkara yang menyalahi kebiasaan yang baik (yang dipuji oleh syarak)

- Perkara yang dizahirkan oleh manusia pilihan yang khusus iaitu manusia yang maksum daripada segala dosa :
 - (a) Irhas
Perkara yang menarik adat yang Allah SWT zahirkan kepada nabi-nabi pada masa kecil, sebagai tanda atau bukti ia akan diangkat oleh Allah SWT menjadi Nabi lagi Rasul membawa Risalah Ketuhanan setelah ia dewasa.
 - (b) Mukjizat
Perkara yang luar biasa yang Allah SWT zahirkan kepada nabi-nabi dan rasul-rasul yang membawa Risalah Ketuhanan untuk dirinya atau disampaikan kepada manusia pada zamannya. Pangkat Iman, Islam dan Ikhsan mereka ini sentiasa bertambah tinggi tiada berkurangan sama sekali.

FASA 4

Perkara-perkara yang menyalahi kebiasaan yang Allah SWT zahirkan kepada manusia umum selagi tidak berlaku qiamat.

- (1) Jenis yang baik (iaitu Ma'unah dan Karomah)
- (2) Jenis yang jahat iaitu Istidraj (sihir peringkat tinggi, sihir peringkat pertengahan dan sihir peringkat rendah).

A. MA'UNAH

Golongan manusia yang asalnya Kafir, Munafik, Zalim dan Fasiq.

- (i) Mengambil Ilmu dan Amal daripada Nabi-nabi dan Rasul-rasul pada zamannya serta melatih diri beramal dengan ilmu itu untuk terjun dalam medan Jihad dengan diri dan harta bagi menjaga dan memelihara maruah Agama Islam, maruah diri dan keturunan yang beragama, menjaga harta dan menjaga tanahair. Mereka melatih diri keluar daripada segala Syirik Rububiyah dan Syirik Uluhiyah, Syirik Jali dan Syirik Khafi, segala dosa besar dan dosa kecil, zahir dan batin kerana :

- i. Rasa gerun dan takut yang sungguh pada diri zahir dan batin akan segala seksaan Allah SWT yang bakal diterima semasa Sakaratulmaut, semasa di dalam Kubur, semasa di Padang Mahsyar dan seksaan di dalam neraka.
 - ii. Rasa rindu yang amat sangat dengan syurga dan segala nikmat yang dijanjikan oleh Allah SWT, sebagai balasan kepada orang yang baik dan sentiasa bertambah baik Iman, Syariat dan Akhlaknya di semua tempat, waktu dan masa seolah-olah syurga dan segala nikmatNya itu nampak pada mata zahir dan seolah-olah sudah merasainya semasa berada di dunia ini lagi. Lebih-lebih lagi pada masa hampir mati, pada masa Sakaratulmaut, semasa di Alam Kubur, semasa di Yaumul Mahsyar dan masuk syurga betul-betul dengan roh dan jasad tanpa hisab dan tanpa melalui Titian Siraj.
- (ii) Golongan ini juga ialah mereka-mereka yang mengambil Ilmu dan Amalan dari mereka yang mengambil Ilmu dan Amalan daripada Nabi dan Rasul atau golongan manusia yang mengambil Ilmu dan Amalan dari mereka-mereka yang akhirnya daripada Nabi lagi Rasul. Sekiranya mereka ini sudah bersih daripada dosa-dosa besar dan masih terjebak dengan dosa-dosa kecil tetapi segera bertaubat dengan taubat yang Nasuha, maka perkara luar biasa yang Allah SWT menzahirkan melalui lidah, anggota dan hati mereka ini dipanggil Ma'unah, sebagai satu pakaian atau tanda dari Allah SWT bahawa mereka ini diangkat menjadi kekasihNya sekiranya mereka sanggup memelihara diri mereka dari terjebak ke dalam dosa besar dan dosa kecil selama-lamanya.

B. AHLI KAROMAH

laitu golongan manusia Ahli Ma'unah yang mengenali Allah SWT dengan sebenar-benarnya melalui mata zahir dan mata hati yang Allah SWT kurniakan padanya dan dirinya itu hamba Allah SWT yang sampai pada Maqam Yakin yang sempurna yang sentiasa bertambah tinggi darjah yakinnya itu, sehingga tidak dapat digambarkan dalam bentuk tulisan, perasaan dan perkataan dan sentiasa pada setiap waktu dan masa menjaga dan memelihara dirinya zahir dan batin daripada terjebak ke dalam dosa besar dan dosa kecil melalui ilmu dan amalannya dalam Aqidah, Syariat, Akhlak, pengorbanan diri dan pengorbanan harta di semua tempat, waktu dan masa selama-lamanya. Mereka ini adalah pewaris Nabi-nabi dan Rasul-rasul pada zaman masing-masing dalam bab ilmu dan amalan serta menjadi Uswatun Hasanah kepada manusia.

FASA 5

Perkara-perkara yang menyalahi kebiasaan yang menjadi salah dan sesat dalam Aqidah, Syariat dan Akhlak.

Manusia-manusia yang menjadi pengamal dalam kategori ini;

- (i) Golongan ulama' dan orang-orang soleh yang pura-pura.
- (ii) Golongan orang fasiq, zalim, munafik, murtad dan kafir.

Mereka ini mengambil ilmu dan amalan:

- (a) Daripada kitab-kitab tanpa merujuk kepada Guru yang ahli pada babnya.
- (b) Daripada orang-orang yang terputus salasilahnya oleh sebab jahat adabnya.
- (c) Dalam mimpi atau menyusun sendiri kalimah-kalimah jampi serapah dan mentera atau mengadakan segala bentuk rupa pemujaan bagi tujuan disanjung, dipuji, dihormati dan digelar sebagai:
 - (i) Maha Jaguh, Bapa Jaguh, Tok Jaguh.
 - (ii) Maha Guru, Bapa Guru, Tok Guru, Pak Kiayi.
 - (iii) Raja, Panglima, Pendekar, Hulubalang, Tok Pawang, Tok Keramat, Tok Bomoh, Tok Dukun, Tok Mudim, Mak Bidan, Mak Andam dan lain-lain lagi.

(ISTIDRAJ) SIHIR PERINGKAT TINGGI YANG SEOLAH-OLAH NAMPAK SEPERTI MA'UNAH DAN KAROMAH PADA SEKALI IMBAS PANDANG

Golongan ini adalah ulama'-ulama' dan orang-orang soleh yang mengambil ilmu dan amalan bagi mendapat sesuatu yang luar dari kebiasaan :

- (i) daripada buku-buku atau kitab-kitab tanpa merujuk kepada Guru yang ahli pada babnya.
- (ii) daripada orang yang terputus salasilah ilmu dan amalannya dengan ulama' yang muktabar yang di atasnya oleh sebab jahat adabnya.
- (iii) mengambil daripada dalam mimpi, pertapaan atau orang-orang yang bertapa dengan tujuan seperti yang tersebut di atas.

Bagi orang-orang yang tersebut di atas, Allah SWT akan menghantar kepada mereka jin-jin Islam yang soleh dan alim seumpama mereka itu. Jin-jin ini datang sama ada

dalam mimpi atau dalam jaga dengan mengaku diri sebagai nabi, wali, orang-orang soleh atau malaikat untuk mengajar ilmu atau amalan bagi menolong dalam segala kerjanya. Jin-jin yang datang dalam mimpi atau jaga untuk mengajar ilmu atau amalan bagi melakukan sesuatu yang luar dari kebiasaan akan (tidak dapat tidak) menetapkan syarat untuk diterima sebagai taulan, rakan, sahabat atau khadam dalam semua kerja dan kemahuannya melalui lidah, anggota dan hati.

Bagi meyakinkan Ulama'-ulama' dan orang Soleh dengan apa yang dilaksanakan itu benar, maka segala syarat yang diberikan akan sama dengan hukum syarak. Setelah menerima syarat tersebut dan beramal dengan ilmu yang diberi, maka nyatalah pada diri ulama' atau orang soleh tersebut segala rupa bentuk perkara yang menyalahi kebiasaan yang nampak pada zahirnya hampir sama dengan Ma'unah dan Karomah. Mula dari saat penerimaan syarat tersebut, ulama' atau orang soleh itu telah mencampakkan dirinya ke dalam Syirik Uluhiyah (Murtad), dalam segala rupa bentuk amalan Syariatnya selagi ia patuh dan tunduk kepada syarat tersebut.

Nota : Jika sebenarnya nabi-nabi, wali-wali atau malaikat yang datang sebagai utusan Allah SWT pada diri orang-orang itu dalam mimpi atau jaga, maka apa yang diisyaratkan atau diucapkan oleh nabi, wali atau malaikat yang datang itu kepadanya, nescaya Allah SWT akan zahirkan ke atas dirinya seperti yang diisyaratkan atau diucapkan itu. Maksudnya, diri orang yang menerima kunjungan itu akan berada seperti yang diisyaratkan atau diucapkan tanpa apa-apa syarat yang dikenakan.

(ISTIDRAJ) SIHIR PERINGKAT PERTENGAHAN

Golongan orang Islam yang fasiq, zalim dan munafik mengambil ilmu dan amalan daripada Ulama'-ulama' dan orang Soleh yang bersahabat dengan jin, yang patuh kepada syarat yang sama dengan hukum syarak. Golongan ulama' dan orang soleh begini akan menurunkan ilmu dan akan meletakkan syarat yang sama seperti mana ia terima daripada sahabat jinnya, dan dinamakan kepada muridnya sebagai pantang larang.

Apabila si murid itu mengaku menerima ilmu dan amalan dengan segala pantang larangnya maka Syirik Uluhiyah yang ada pada ulama atau orang soleh itu turun pula pada si murid yang akan duduk beramal dengan dirinya berada dalam keadaan murtad. Di kala itu si murid akan didatangi jin-jin Islam yang fasiq atau kafir dalam tidur atau jaga dengan mengaku sebagai nabi, wali, orang-orang soleh atau malaikat dan meletakkan syarat yang harus dalam hukum syarak bagi bersahabat dan berkawan dalam semua kerja buatnya.

Diantara syarat-syarat yang harus dalam hukum syarak :

- (a) Syarat dalam bentuk hidangan makanan dan minuman seperti pulut putih atau kuning, ayam panggang, bubur warna, bertih dan sebagainya.
- (b) Dalam bentuk pakaian berwarna kuning, hijau, hitam atau merah, cincin, wafak, azimat, gelang, tangkal, mahkota, selendang dan sebagainya.
- (c) Alat-alat senjata seperti keris, pedang, lembing dan lain-lain atau ketiga-tiga syarat itu serentak atau dua dari tiga syarat di atas.

(ISTIDRAJ) SIHIR PERINGKAT RENDAH (IHANAH DAN SYA'WAZAH)

Golongan orang-orang fasiq, zalim, munafik dan kafir yang ingin menonjolkan kehebatan dan kebesaran. Mereka ini mengambil ilmu dan amalan daripada orang yang sejenis dengannya daripada segala rupa bentuk jampi, serapah dan mentera yang terpesong dari kaedah syarak pada kalimahnyanya dan ayatnya ataupun mengadakan segala rupa bentuk pemujaan yang di luar batas syarak. Dengan itu, mereka ini akan didatangi oleh jin-jin yang kafir samada di dalam mimpi atau jaga, dengan mengenakan syarat-syarat yang haram dalam hukum syarak sebagai syarat untuk bersahabat dan bertaulan dalam semua kerja buatnya.

Di antara nama-nama gelaran bagi jin yang biasa disebut oleh masyarakat adalah seperti berikut :

- | | | | |
|---------------|--------------|--------------------|-------------------|
| 1. Hantu Raya | 6. Pari-pari | 11. Hantu Kubur | 16. Hantu Bungkus |
| 2. Jin Tanah | 7. Langsuir | 12. Jerangkung | 17. Hantu Air |
| 3. Polong | 8. Toyol | 13. Hantu Galah | 18. Pocong |
| 4. Mambang | 9. Pontianak | 14. Tenggelong | 19. Hantu Laut |
| 5. Bajang | 10. Pelesit | 15. Harimau Jadian | dan sebagainya. |

Kesemua yang tersebut di atas dan lain-lain yang seumpamanya adalah dari jenis jin yang diberi nama sedemikian oleh orang Melayu, tetapi di dalam Al-Quran semua jenis jin yang menjadi keturunan dan bala tentera Azazil Iblis Laknatullah disebut **Ifrit**.

RISIKO YANG AKAN DITERIMA OLEH 3 KELOMPOK MANUSIA YANG BERSAHABAT DENGAN JIN

Puak jin akan bertindak melayan manusia yang memohon pertolongannya dalam segala rupa bentuk ilmu sihir, manusia itu dipanggil Kahin, A'arof atau Munajjin seperti yang disebut dalam Hadis Nabi SAW. Seperti yang dijelaskan dahulu, pengamal ajaran sesat yang mendampingi jin-jin dalam kerja buat mereka berada dalam kesesatan Aqidah, Syariat dan Akhlak. Golongan ini mempamerkan segala rupa bentuk kehebatan dan perkara-perkara yang luar biasa, di antaranya ;

- (a) Kebal.
- (b) Mandi minyak panas yang semata-mata mempamerkan kehebatan bukan untuk tujuan perubatan.
- (c) Segala rupa bentuk pukau memukau.
- (d) Segala rupa bentuk ilmu jurus.
- (e) Segala rupa bentuk hilang diri dan lain-lain kehebatan yang kesemuanya khayal dan waham semata-mata.

Apabila pengamal ajaran sesat mati, jin-jin yang menjadi sahabat mereka itu akan mendatangi anak cucu keturunannya dalam mimpi atau jaga, menuntut agar diteruskan syarat perjanjian yang sedia ada.

Jika anak cucunya berdegil atau ingkar atas syarat-syarat tersebut, mereka akan mengalami berbagai jenis bala dan penyakit serta halangan-halangan dalam kerja buat mereka. Keadaan ini dipanggil gangguan keturunan (saka), dan antara tanda-tanda gangguan tersebut dalam sebuah keluarga ialah:

- (a) Masalah di dalam pertunangan, perkahwinan, kekeluargaan dan kemasyarakatan.
- (b) Mandul (bukan dari sebab masalah organ peranakan)
- (c) Kerap berlaku keguguran anak dalam kandungan.
- (d) Anak hilang dalam kandungan.
- (e) Melahirkan anak cacat anggota atau fikiran atau cacat kedua-duanya.

- (f) Melahirkan anak yang buruk akhlak walaupun menjadi 'ahli agama' atau ulama' besar kerana ada pada diri anak tersebut antaranya sifat-sifat berikut:
- (i) Lekas marah (panas baran).
 - (ii) Cemburu buta.
 - (iii) Irihati, hasad dengki.
 - (iv) Jahat sangka.
 - (v) Mimpi yang menyeronokkan yang jarang-jarang jadi kenyataan.
 - (vi) Jin menjelma masuk ke dalam dirinya mengaku nabi, wali atau malaikat dengan menzahirkan perkara yang menarik adat sebagai bukti kebenaran.
- (g) Mempunyai kelebihan dapat melihat alam atau makhluk ghaib, kebolehan mendatangkan perkara biasa melalui jalan yang luar biasa, umpamanya mendatangkan objek seperti batu cincin, duit emas, keris dan sebagainya.
- (h) Suka bergaduh dan lekas naik darah sehingga pukul memukul, bercerai berai dan sebagainya.
- (i) Hilang ceria diri dalam rumah kediaman.
- (j) Sakit yang berlari-lari (berpindah-pindah tempat di badan) atau sakit di antara kulit dan isi yang tidak dapat dikesan oleh doktor pakar melalui kaedah saintifik.
- (k) Jin menjelma masuk ke dalam badan sehingga tidak sedarkan diri, biasanya dipanggil histeria, kerasukkan dan sebagainya.
- (l) Mimpi yang menakutkan dan menzahirkan beberapa perkara yang merosakkan dan menakutkan seperti :
- Api yang menyala dengan sendiri.
 - Bunyi orang berjalan.
 - Bunyi orang menangis.
 - Bau-bauan.
 - Bunyi bising dan sebagainya.

ANTARA SEBAB-SEBAB SESEORANG ITU DISIHIR

- (a) Masalah perniagaan seperti berkedai, berjaja, kontraktor dan sebagainya.
- (b) Putus pertunangan.
- (c) Masalah pinangan yang tidak diterima.
- (d) Merebut pangkat kedudukan dalam masyarakat.
- (e) Merebut pangkat dalam pekerjaan samada swasta atau kerajaan.
- (f) Merebut harta pusaka.
- (g) Irihati dengan kelebihan jiran tetangga.
- (h) Cemburu, jahat sangka dan lain-lain yang seumpamanya.

SILAT DAN PERBOMOCHAN MENURUT ISLAM

Sebelum dihuraikan perkataan 'silat', terlebih dahulu dihuraikan perkataan 'gayung'. Perkataan 'gayung' asalnya daripada perkataan Melayu Kuno. Asal perkataannya terbit daripada perkataan 'gawang'. Sebagai contoh gawang tangan, gawang siku, gawang kepala, gawang badan, gawang lutut, gawang kaki, menolak, menyepak, menepis sesuatu kejahatan yang datang pada diri.

Perkataan 'gawang' ertinya satu sifat yang dikurniakan oleh Allah SWT kepada semua jenis bernyawa yang terdiri daripada manusia dan binatang bagi menolak jahat dan menerima baik sama ada secara tiba-tiba ataupun melalui susunan latihan. Daripada perkataan 'gawang' inilah terbitnya perkataan 'gayung'.

Perkataan 'gayung' pula kalau diterjemahkan ke dalam bahasa kita sekarang ertinya susunan langkah pertahanan diri iaitu setiap satu susunan langkah yang disertakan dengan tumbuk-menumbuk, sepak-menyepak, terajang, tepis- menepis, lompat-melompat, elak-mengelak dan sebagainya, kaedah ini memang ada pada setiap bangsa di dunia.

Sebagai contoh :-

Di Thailand dikenali sebagai 'Muay' Thai.

Di kalangan Melayu dikenali sebagai 'Gayung'.

Di Cina dikenali dengan Kung Fu.

Di Jepun dikenali sebagai Judo.

Di Parsi dikenali sebagai Gusti.

Di India dikenali sebagai Silambam.

Kecepatan, ketangkasan dan kelasakkan dalam latihan gayung (latihan pertahan diri) terwujud hasil daripada lama masa dan tabah di dalam melaksanakan latihan tersebut. Setengah-setengah bangsa khususiah kelompok orang-orang Melayu berusaha mencari suatu cara atau suatu aturcara yang boleh dikepilkan atau disertakan dalam diri atau di luar diri bagi tujuan menzahirkan kehebatan yang lebih berganda-ganda sehingga di luar batas pemikiran biasa. Untuk itu wujudlah berbagai bentuk jampi serapah, kunjungan dan pemujaan mengikut kaedah gaya dan selera masing-masing.

Antara rupa bentuk pemujaan adalah :

- a. Semahan darah-darah binatang haram atau halal.
- b. Menyembah dan memuja rangka badan manusia atau binatang atau yang seumpama dengannya.
- c. Menyembah dan memuja rupa bentuk sesuatu sama ada besar atau kecil dari alat-alat senjata.
- d. Mengadakan jamuan makanan dan minuman yang halal atau haram.
- e. Alat-alat bunyian.
- f. Adapun jampi serapah pula adalah daripada kalimah-kalimah atau ayat-ayat yang direka sendiri mengikut khayalan atau dalam mimpi atau bisikan atau dari suara yang tidak diketahui arah datangnya atau tuannya.
- g. Pelbagai benda atau tulisan dijadikan tangkal atau azimat.

Apabila si pengamal yang bercita-cita atau berhajat mendapatkan atau menzahirkan suatu kelebihan maka ia akan melazimkan sepenuh diri dengan mengadakan sepenuh tumpuan kepada semua bentuk pemujaan, jampi serapah dan amalan tersebut. Dikala itu akan datanglah suatu lembaga sama ada di dalam mimpi, khayalan atau dalam jaga, berjanji menolong dalam semua bentuk kerja buat dengan syarat patuh kepada semua perjanjian yang diberi dan ditetapkan.

Lembaga ini dikenali dengan panggilan 'dewa / dewi' oleh masyarakat Melayu silam. Di dalam Al-Quran pula dipanggil dengan perkataan 'jin', manakala bahasa moden memanggilnya dengan 'laser' atau 'hologram'.

'Dewa / dewi' (jin) ini menzahirkan rupa diri dalam bentuk manusia mahupun binatang ataupun yang seumpamanya dan kadang-kadang akan menjelma masuk dalam diri manusia dengan mengaku atau memperkenalkan diri sebagai Tuhan, Nabi, Malaikat, Wali, datuk atau nenek dengan menggayakan beberapa perkara yang luar biasa untuk mengikat manusia yang didatanginya itu agar sentiasa menurut, memuja, menyembah, mengikut dan tunduk patuh kepada semua arahannya supaya tidak terputus hubungan. Saka-baka keturunan dan semua bentuk sihir, istidraj, silap mata berasal dan terbit dari sini. Permainan dewa / dewi ini hanyalah sekadar menggantikan sesuatu dengan sesuatu dan ianya terhad atau dengan mengalihkan pandangan mata. Berbeza dengan irhas, mukjizat, karomah dan ma'unah yang mana dasarnya paling sesuatu kepada sesuatu, walau seberapa banyak dan luas sekalipun.

Di dalam Agama Islam, ilmu dan amal sedemikian dipanggil ajaran sesat kerana telah menyesatkan aqidah, syariat dan akhlak seseorang insan yang berada di dalam Agama Islam sehingga dipanggil atau dinamakan syirik, murtad, kufur, munafiq, zalim dan fasiq, kerana si pengamal itu telah jatuh kepada Syirik Uluhiyyah dan Syirik Rubbubiyah, kufur dan maksiat di dalam ilmu dan amalannya.

Tujuan mereka mengadakan yang seumpama dengan yang tersebut hanyalah semata-mata ingin mempamerkan kehebatan, kebesaran, keunggulan kepada masyarakat setempat supaya mereka disanjung, dipuja dan dipuji, dikunjungi, diambil ilmu dan amal daripadanya. Dari sini lahirlah pula individu manusia yang digelar mahaguru, mahajaguh, maharaja, pendekar, hulubalang, panglima, tok pawang, tok bomoh, tok mudim, tok bidan, mak andam dan sebagainya.

SILAT

Perkataan 'SILAT' berasal dari Bahasa Arab iaitu 'As Silsilati'. Tok Guru saya kata As-Silsilati itu boleh diterjemahkan dengan perkataan perhubungan, hubung kait atau kaitan. Perkataan silat kalau diterjemahkan ke dalam bahasa kita sekarang ertinya latihan pertahanan diri yang ada hubung kait, yang ada kaitan sepertimana yang diajar oleh Nabi SAW kepada sahabat, sahabat pula mengajarkan kepada tabiin dan seterusnya. Iaitu suatu latihan pertahanan diri tidak kira di atas apa juga susunan langkah yang diberi nama atau yang belum diberi nama yang disertakan dengan qosod dan tujuan menjual diri dan hartanya kepada Allah SWT dan Rasul dan sentiasa berada di atas dasar aqidah, syariat dan akhlak Rasulullah SAW kerana :-

- a. Menjaga kesucian Agama Islam.
- b. Menjaga maruah diri dan keturunan yang beragama Islam.
- c. Menjaga harta dan tanahair orang Islam.

Iaitulah suatu latihan yang bebas dari Syirik Uluhiyyah dan Syirik Rububiyah dalam ilmu dan amal. Suatu latihan yang mengajak ahli-ahlinya berada di dalam Tauhid Uluhiyyah dan Tauhid Rububiyah yang membawa kepada kemantapan aqidah, syariat dan akhlak yang sentiasa mengikat darjatnya di sisi Allah SWT.

Manakala wirid, jampi, doa pula daripada Al-Quran, Al-Hadis Nabawi dan yang diambil dari ulama' yang ahli pada babnya yang ada untaian dan rangkaian salasilah ambilannya sehingga sampai kepada junjungan besar Nabi Muhammad SAW atau paling kurang sampai kepada ulama' muktabar yang mahsyur dan dikenali umum, disamping melazimkan puasa sunat dan sembahyang sunat sebagai tetamu kepada amalan yang telah difardhukan dan diwajibkan di dalam Agama Islam.

Dari sini dapatlah difahami dengan jelas dan ketara di antara latihan pertahanan diri, perbomohan, kebatinan dan kerohanian yang menurut Agama Islam dan yang tidak menurut Agama Islam berdasarkan fahaman Ahli Sunnah Wal Jamaah.

Antara perbezaan pokok yang jelas dan ketara bagi mereka-mereka yang tidak menurut Islam dalam latihan pertahan diri, kerohanian dan perbomohan atau seumpamanya itu mesti akan terdapat atau ada pada diri mereka beberapa perkara berikut :

1. Jahil Murakab.
2. Jahil Basit.
3. Ikut membabi buta.
4. Berpegang teguh kepada hukum adat semata-mata.
5. Mengikut bijaksana pemikiran semata-mata.
6. I'tiqad Hululiyah dan I'tiqad Wahdatul Wujud.
7. Memuja roh dan penjelmaan roh ke dalam diri.
8. Jahil dalam kaedah Bahasa Arab di dalam menghuraikan ayat-ayat Al-Quran, Hadis Nabi dan kitab-kitab Ulama' atau kurang cermat mentafsir ayat dan perkataan mereka.
9. Mengambil ilmu dan amal dari orang jahil aqidah, syariat dan akhlak atau orang yang tidak beramal dengan aqidah, syariat dan akhlak.
10. Ada perjanjian yang sama dengan hukum syarak, harus dan haram dalam hukum syarak.
11. Tidak mendekati alim ulama' yang ahli pada babnya dan tidak mengambil nasihat dan pengajaran daripada mereka.
12. Mengadakan mubai'ah yang disertakan dengan sumpah bagi memberatkan diri melaksanakan yang baik dan menjauhkan yang jahat.
13. Berpegang teguh dan beri'tiqad yang wirid, jampi dan doa boleh menghasilkan sesuatu.
14. Menderhaka kepada Raja dan melanggar undang-undang Negara.

Ciri-ciri Latihan Pertahanan Diri, Perubatan, Perbomohan dan lain-lain menurut perspektif Islam antaranya :-

1. Sentiasa berpegang teguh kepada Tauhid Uluhiyyah dan Tauhid Rububiyah dan memelihara diri supaya tidak terjatuh kepada Syirik Uluhiyyah dan Syirik Rububiyah dalam ilmu dan amalan.
2. Memulakan sesuatu yang baik dengan Istighfar, Syahadatain, Taawudz dan Bismillah.
3. Tidak bercampur lelaki dan perempuan yang halal nikah dalam amalan latihan dan dalam perubatan.
4. Latihan itu hanya semata-mata ubudiyah diri, zahir dan batin kepada Allah SWT bagi meningkatkan keyakinan yang tinggi serta mencapai akhlak yang mulia.
5. Berpakaian yang menutup aurat.
6. Tidak membangsakan susunan langkah itu kepada apa yang dilakukan oleh Nabi SAW atau mana-mana Nabi dan Rasul Alaihi Massalam atau kepada mana-mana Rukun Fi'li Islam bagi mengatakan ketinggian dan kehebatan susunan langkahnya.
7. Latihan pertahan diri adalah suatu sunnah dalam Agama Islam jika tujuannya seperti yang tersebut dalam huraian perkataan silat, kerana Nabi Muhammad SAW sendiri menjadi jaguh gusti Semenanjung Arab, dan menjadi panglima agung dalam peperangan dan menjadi maharaja dalam pemerintahan.
8. Memperkukuhkan hubungan silaturrahim dan persaudaraan dalam Agama Islam.
9. Dibolehkan mengambil upah jampi tetapi tidak boleh menjaminkan hasil hajat dan kesembuhan penyakit tanpa bersandarkan kepada Allah SWT.

